

陶
山
文
錄

陶山文錄卷六

善化 唐仲冕

議書 笈

謹擬補請

賜諡明桂藩時宜興李氏三忠臣議

伏以寬大之朝無忌諱於已往旌勵之典恒摻擇於未彰恭讀

高宗純皇帝

御批歷代通鑑輯覽附錄明季三藩竊歎

大聖人與覆載同量桂藩之流離瑣尾猶得比於宋之

不陸山文錄卷六
是曷其臣之死事者一體

賜諡分別專諡通諡祀忠義祠見勝朝殉節諸臣錄此
誠曠古浩蕩之恩所以獎勁操而表毅魄者罔或遐遺
若江蘇宜興李氏三忠臣固鼎革時記載所未著者也
謹按李用楫及弟耒及其族大父順皆仕桂藩忠於所
事有死無二自書禁旣弛三藩紀事諸書出而其心跡
以顯用楫崇禎癸未進士瓊州推官桂王立於肇慶行
取御史歷太常少卿大學士吳貞毓薦爲兵部侍郎巡
撫肇高廉雷瓊羅時

大兵已破梅嶺國勢日蹙順治九年耿繼茂兵至用楫

力拒之戰於合浦之青頭營總兵萬良以虛實輸耿夜
劫營師遂潰用楫僅以身免至靈山門生勞貞觀家肅
衣冠沈於其池以死未隨兄瓊州以選貢爲中書歷官
監軍道肇慶失守矢志恢復順治十年七月從李定國
攻圍肇慶親冒矢石定國敗未殉難於德慶州願亦以
選貢歷官江西道監察御史時桂藩在安隆受制於孫
可望願與吳貞毓等謀勅李定國入衛使員外郎林青
陽齎勅行事泄爲可望所殺凡十八人已而青陽逮至
亦被殺此順治十一年春事也三年之中三人先後死
義於例皆可得諡或謂用楫師潰身免免而後死爲計

無復之耳今考用楫之免將以有爲乃過八合墟幾爲
土官薛威鳳所刼不得已而還遂死於勞氏其志亦可
哀已未之盡節於德慶也或以從李定國攻城而死爲
李死非爲桂死願則以十八人入林青陽而不列二人
之未得諡或由於此然德慶之死志在恢復見於府縣
志及李氏家乘若十八人之有李願而無林青陽詳於
見聞隨筆桂藩詔可望奏願口占詩安隆馬場十八先
生成仁處碑記是青陽之死後於願不在十八人中
也繼用楫爲巡撫者曰張孝起是年六月走避

大兵於龍門島被執死後與安隆被害之吳貞毓專諡

忠節其十七人通諡烈愍臣愚以爲李用楫之殉節先
於張孝起李耒之殉節同於李用楫李頥與十八人同
日被害孝起諡則用楫耒亦可旌十七人通諡則頥亦
當並錄前宰荆溪表章

賜諡忠肅之廬象升暨其弟象觀因知同城宜興有李
氏三忠近又得其裔孫慶來所輯事實考證信而有徵
伏惟

朝廷繼述龐鴻崇節闡幽無微不至似宜補請

勅下禮部查照乾隆四十一年之例覈實補諡使百有
餘年沈霾之志節復見

天日光昭泉壤教垂奕禩豈惟李氏一門之榮幸已哉
謹議

有關風化之文

姚姬傳先生

上費大中丞興利除害議

竊奉檄飭查境內一切有關民瘼應興應革直抒已見
熟議具稟等因仰見執事念切安民道嚴察吏峻澄清
之軌範播愷悌之風猷下吏惟當仰承教條何容妄參
末議伏念州縣之政不越教養二端乃人文盛而教士
者專在場屋戶口繁而養民者聽之閭閻其於根本之
業久遠之圖誠如明諭當講求洞然而後可施行也欣
遇虛衷下詢安敢固陋自藏特恐書生見近迂儒少年
情多喜事或空言而不可行或躐行而不可久謬臚四
款敬呈鈞鑒

一課士宜以行爲先責成牧令也諸生歲試月課舉優報劣責在教官士子與長吏漠不相關其稍雋者負詩筆爲名士鄙簿書爲俗吏其不肖者出入衙門因緣爲利干預詞訟挾制官長學師旣無如何有司深患苦之甚至相爲敵仇固爲政者德不足服人抑平時六行之教尙疏而九兩之繫不屬也請自今牧宰到官首先延訪如武城之得澹臺稟明上官以爲風化倡亦以覘牧宰之識每歲之中當如周官讀法之期親至明倫堂會集子衿講究性理經書因察其品行微示褒貶長官無故不舉行師生無故不會講皆有罰至於學使取人生

員鄉試所登賢書本係糊名暗選宜令各州縣廉審其
人之行誼有悖於教典者與教官申明黜之其補廩貢
優亦許牧令參詳人品以定取舍著爲功令則科目取
士之中隱寓鄉里舉選之法俾士子曉然於文必有行
官師共相糾虔不敢恃詞章博科名以自肆也或謂士
本柔懦又使州縣摧折之乎夫公論難逃吏議亦重州
縣何人輒能恣行胸臆稍有不公羣起攻之況廉不得
實知而不舉者嚴予處分是以造士而兼察吏也

一訓俗宜與民相見力行保甲也保甲之法察姦弭盜
除莠安良法至善也今州縣分幾都幾箇幾里里必有

甲胄必有保徵錢糧起徒役勾攝獄訟非保甲不能辦而其用止於如此孟子所云守望親睦之效未易臻而藏奸欺懦勾通吏胥之弊往往而有是何也行之不力而州縣官弗躬弗親故也周之比長尙爲下士今之保正實同胥保良者不充充者不良以不良之人使化其胥里之人爲良是却行而求前也法當擇一鄉之良者充其選優以禮貌察其所統鄉里一歲之中無寇盜無爭訟者請給鄉約頂帶庶里甲胄長不至埒於賤役然必官親體察不可寄耳目於吏胥凡有公事行鄉卽將其鄉之詞訟案件就近審理與其父老子弟講孝友話

農桑則官相親而保甲之賢否不問而可知矣

一水利重在橋岸宜專委任也吳淞爲江湖之會故垂虹橋六十二洞及塘路八十餘里皆有橋洞各圩皆有堰岸所以疏洩而捍衛之者凡以爲民田廬計也今太湖上流水勢旣減長橋附近之處沙泥停積茭蘆暢茂白不宜泥古擾民而橋洞仍當濬治以備衝潰現修垂虹橋通其淤塞平望東南之三里橋亦次第修建其塘路爲漕艘所經縣北夾浦橋及平望安德橋等處每逢春初水涸利在挖淺蓋春雨發則水多西風起則湖漲正可隨時斟酌勞費無多雖低下者易致漫溢然塘身

爲湖蕩夾攻不宜太高亦惟臨時疏導先後培壅惟田各有圩圩各有岸平時飭令圩甲率民修補一有積水卽當竭力車戽若有高下不均貧富相抗之爭總令圩甲設法先去積水然後治其獄訟懲其頑怠本邑主簿一員本司水利當大雨時行宜令親往巡視專其責成邑令亦順道指示不避風雨俾小民知官吏救水如救火庶幾水不爲害田無憂溺矣

一漕米謹於收兌宜戢幫丁也蘇屬漕額每畝上則至一斗九升最爲重賦豈容額外取盈自運丁婪索津貼州縣設法通融始則以公濟公繼且假公濟私於是吏

胥緣爲侵漁生監肆爲吞噬谿壑無窮脂膏易竭官反
因此而虧民寔先受其病且浮收則米色不純米雜則
丁索愈濫不如慎選好米平斛響攬生監無可藉口吏
胥焉敢犯科卽糧艘受兌米皆乾潔北壩倉場可免挑
駁計其出運所領官項本折爲數不少在安分運丁亦
以爲足唯有尖丁運棍遇事生風藉端把持牢不可破
仰懇嚴飭痛懲

奏明糧船抵通一切糜費概行禁止如此而州縣尙有
浮收升斗者立登白簡則民困甦而官虧亦可漸復矣
謹按吳江素稱澤國家鮮蓋藏農夫兼以駕船爲生士

子多以遊幕爲業地當衝要厨傳靡停人聯都會莠良
不一惟在親民之官謹身帥先居以廉平自可廢墜具
舉頑梗胥化除清查糧冊設法緝捕訓練民壯釐定祀
典隨事另稟請示外謹就智慮所及利病所關具陳所
以養士氣厚民風者望執事鑒核明誨俾有遵循或由
一邑而推之他邑庶管蠡之思亦可少助高廣之用

檄查利弊在他人不過奉行故事此獨愷切條陳可
爲牧民楷法

姚姬傳先生

上制府委查河海灘地議

頃蒙劄開海安阜三州縣海灘河淤分別召變繳價復
賦查辦已及二年尙無成數該道曾知海州素得民心
刻卽星馳督理妥速具詳毋得諉延等因竊查海州潮
汎東徙雲臺山可策馬而登其間灘地至廣數十年來
漸可墾耕然潮十年不至始生紅菱二十年始克種麥
未三十年則又有大潮泛濫仍爲斥鹵近因黃河由王
營減壩溢入海灘逐段淤泥醲厚肥美但投種子卽獲
豐收然三數年後淤減鹵升曾礲瘠之不若矣興此議
者聽宵人之言狃目前之利以爲召變價可數百萬復

賦歲可數十萬致興此役節相覆奏有

國家敷天置表罄地陳圖不與水爭地不與民爭利誠古大臣訏謨遠猷百世不刊之論也迺爲部中迫促勉強遷就亦宜體察地勢博詢輿情斟酌一二以完此局若欲稍符原奏雖聖者亦所不能今且員吏四出寒暑奔馳招聚農畝丈量阡陌黠者因緣爲姦懦者壅隘無控耽延歲月勞費紛紜將以興利而得不償失將以平訟而爭端益起歷時愈久爲害愈大計惟有據實奏報埽除葛藤使三州縣之民曉然知無朘削之術案堵如故卽令地有遺利亦在民耳於官府何損焉不然諸能

吏經畫二年之久而不見成數職道亦安能咄嗟而辦
竭蹶而成之哉節相在粵東誅二十年之逋寇使窮海
戢安來江南塞南北岸之隄防使長河順軌可謂勞在
社稷澤在生民矣此一事近於謀利而實無大利可謀
不如速已以孚衆望職道旣蒙委任何敢推諉一隙之
見不得不陳伏惟垂鑒而訓誨之幸甚

敷陳處具有卓識

持謙記

上制府承查海州安東阜寧等縣河海淤灘地畝

復賦墾科繳價議

伏查此案節奉蘇部堂原奏憲臺覆奏各在案所有海灘河淤地畝連海安阜三州縣境不下二三百里之長但濱海者潟鹵之氣易長難消濱河者漫溢之餘薄利初復若照荒田召墾之例尙當給予籽種牛糧今聽民自墾數年以來足償其費固未便任其無糧自佔究與腹內成熟之地大相逕庭是以酌量科則陞賦寬其隱漏輕其價值所以仰體

皇仁俾民氣常得寬舒其城鹵不毛沮洳灘等地甚

多不能耕種必須剔除不敢以多爲貴有名無實其復
賦之地雖經受淤究屬力薄亦難照乾隆四十五年原
豁科則征收漕米其陞科銀數應照該州縣舊賦之下
則三等分別定則其召變價值並無成案可稽但宜體
量地力爲等差以符原奏酌中定額之語查海州莞濱
附竈五莊康熙二十八年該州詳明藩司以七尺五寸
爲弓立有碑式寔緣當時地甚荒僻是以寬其弓口廣
爲招徠今以五尺弓丈量一畝乃得二畝二分有半雖
較昔稍熟僅可一體陞賦若作新淤召變在小民無知
以爲百餘年來服先疇之畝畝竟成越畔之農昨察看

竈力實有不足自應俯順輿情免其繳價其葺蕩左右
兩營額內亦經分別產柴者歸營不產柴者召民領買
惟不產柴之地在蕩心之柴地內者未便令民承買除
劃給樵兵每名三十畝外仍留營納草免啓兵民相爭
之漸至於舊灘新淤民間或報升而不實或私墾而不
報利之所在爭端由起一旦舉而歸之於公必須剴切
示諭令其曉然知維正之供尤必查丈分明令其確然
知經界之定有正供則爭釁自消有定界則訟案自結
以副原奏裕課息訟憲劄有條不紊經久可行之至意
再據廟灣場大使申報竈蕩有堪成熟地一千餘頃應

按照竈課最重科則復賦查該場所報前項地畝係乾隆二十九年高鹽政奏豁原地雖因陳家浦漫口淤墊稍可耕種但其地原爲長草供煎而設例不准墾有礙竈利應請毋庸復課仍飭禁開墾並咨鹽院轉飭遵照可否免與此案入奏之處伏候鈞裁除開呈簡明圖冊并擬議章程外合將會議緣由縷陳憲鑒

體量地力爲等差則上裕 國課下順輿情所謂宰相須用讀書人也

持謙記

覆河海灘地價值科則礙難增估議

竊奉鈞批前稟冊內所擬價值殊屬短估卽陞科銀數亦須比照各州縣徵冊分其優劣未應專比下則等因覆查三州縣海灘河淤之地其土脉之瘠肥與產植之厚薄情形原有不同估定自難一致卽如葦蕩右營丈出新淤熟地逼近黃河受淤最厚一經翻犁卽可稔收爲三州縣新淤地內最腴之地是以定價每畝一兩年家港地次之定價八錢海州越河西岸宜麥地尙未經墾者又次之定價五錢又右營草地之最茂者定價四錢其餘雖可試墾物土之宜皆不及前四款酌中議價

分爲三等上者三錢次二錢次一錢視初估已稍有加不能再議增數至於所定賦額雖價值一兩八錢五錢四錢之多不過因此時淤泥稍厚歲收豐美一二年後淤減地薄卽與定價三錢者等自應同三等定價之地確按三州縣無漕額征分別定擬未便牽合比照伏念查丈新淤必使地力得盡開闢之利民情仍安樂利之床倘估價過高買業者必至逾限拖欠其患猶在目前若科則太重作苦者必致逋負逃亡其害更貽日後職道等固不敢以則壤成賦稍任額預亦不敢以務得貪多意爲增益憲臺前奏原有不與水爭地不與民爭利

之說祇緣地不歸公小民反多爭訟必應清釐訂正俾各安其田里則所以裕課者猶小而所以卹民者最大也蘇部堂所奏開方之法既不可概之沿河沿海所擬百萬之價十萬之賦雖罄淮北之地不足以備之亦非聖天子藏富於民之盛意也冒昧議陳伏惟鈞誨

海灘三議反覆數百言國計民生兩有裨益視以商桑之術富國病民者何啻霄壤況民病而國斷不能獨富仁人之言其利溥吏治端從經術中來也

如孫淵

上布政使被災州縣蠲緩漕米議

本年八月十五日奉憲札開查本年被災州縣蠲緩漕糧所有被災地畝應將錢糧漕米照例蠲緩其不成災地畝漕糧仍照額徵收其錢糧於緩帶例限外再展寬一二年以紓民力仰卽妥議詳覆等因奉此仰見執事籌畫精詳於

國計民生兩有裨益凡歷年豐收今歲稍歉之民旣將地丁寬期緩帶所有應完漕米諒無不踴躍輸將唯是淮北州縣情形與江淮以南頗有不同卽如海州地瘠民貧連年災歉屢奉

恩蠲今秋低窪被水雖勘不成災已請緩徵在案究之地丁科則本輕漕糧價值太貴民間得緩丁之利輕而被徵漕之累重於民力尙未免拮据伏思淮荒數州縣之漕米不及江南一大縣雖復徵收於天庾之充有限而連年歉薄之民必重厯痼瘵在抱之意所有淮北如海流等處可否仍照例丁漕並緩只徵熟田之處出自憲恩緣奉飭議合肅稟陳

爲民請命如此懇致足徵平時息息相關也

持謙記

覆汪大中丞清理虐政議

本月十五日接奉憲札指示年歲收成當先清理虐政以迓甘和分列四條剴切告戒仁人之言其利溥哉迴環雒誦反覆紬繹恍如甘雨和風來集紙上仰見執事體

聖天子中和位育之庥著官箴而恤民隱非尋常文告所可比也伏念海州地瘠民貧十年九荒非蠲卽緩自舊歲小稔新麥登場民始知有生業樂於輸將然去秋今春雨澤愆期卑職登山浮海以求之幸而得雨誠如鈞諭所謂臨時引咎禱求事後追悔補救今蒙執事誠

求豐歉之由確示感召之要撫躬循省踧踖難安謹就
四條情弊據實登答不敢作一欺心之語伏查班房久
經禁撤而猶陽奉陰違者貪者藉爲恐嚇取財情者任
聽胥役索詐卑職入官以來頗以廉勤自矢除小竊賊
犯拘夥弔贓暫行管押俟結案發落外其餘詞訟案件
從無羈押之累每遇准理差票必酌道里遠近人數多
寡硃限某日解到卽於是日審訊更無送卷挂牌等事
以致耽延儻或逾限重責原差又隨時密查各飯店客
寓寺觀等處恐有寓居訟事之人或兩造已齊而原差
不稟到者立予嚴懲至於審理斷結卽令釋回或案難

率結准取的保亦並不聞有取保難行之說也枷杖例有定式歷任所經江南多不及式江北或稍過之亦不至板重十餘觔枷重百餘觔如卑州僻處海濱界連東省間有曳刀私梟匪犯情重法輕者若以蒲鞭示辱反致水懦民玩地方官德不足以化民雖不得有慘酷之實亦不可無嚴威之名卑職素性慈柔人多慢易勉爲峻厲法在必行故得兇徒漸戢良善稍安然如連根之杖數孔之枷任意敲扑累日疊責等弊亦不敢故爲殘忍致攪禍尤若夾棍之設原爲重犯狡賴而用平常訟件藉以取供必成鍛鍊歷官十餘年從未輕用比較代

杖江以南多有之官吳中時深知此弊不肯墮其術中
勸諭徵輸雖間有賠累亦有糧則稍重民力未紓未盡
催科之拙也此地則權其緩急年清年欸無所用其比
較凡此四者皆足干陰陽之和召水旱之災且明有典
刑幽有鬼神計惟凜凜焉奉鈞札於座右朝夕觀感警
惕勉而行之以期實效無蹈空言抑卑職竊由執事清
理虐政之意而推廣之獄訟繁多易滋拖累胥役肆擾
鮮獲敢休大約易准難審則訟師逞其伎倆多差少解
則胥役恣其誅求親訊呈詞以察其端倪勒審速結以
絕其支蔓不轉票以清案牘不添差以省紛煩訟師工

於搭臺尙詞近架捏必究暗中主唆之人以靖險健之
習差役擅持鐵索苟案非命盜必標不許用鎖四字以
斷嚇詐之緣此固尋常治官之法而以實心行之似尙
有益於民或亦清釐庶獄之一端乎要使百姓無生怨
惡斯四時自協雨暘伏惟執事本愷悌之懷釀和平之
福卑職不能導迎善氣又安敢稍涉浮辭惟望採擇施
行俾吏盡其職民安其生則非特卑職一人之私幸也
伏祈鈞鑒

存心愷惻處事精詳故能言之鑿鑿若此膺民社者
宜各錄一通

秦小峴

請鹽運使飭修兩六塘河堤岸議

竊查海州境內場河一道向受南北兩六塘河之水由武障項冲等壩歸海近來夏秋之間西水泛溢輒浸民田場河又因秋冬水涸藉濟李工黃流所經沙停水淺六塘波泛愈不能容商閉壩以濟運民決防以洩滂爭訟繁興職此之由今歲場河雖浚河底仍淤現在會同分司詳請修各石壩在案而海流安三州縣士民擅開武障項冲等壩奉飭提究亦在案伏思場河之淺由於清水之不足清水之弱由於堤堰之不修堤修則兩六塘水皆歸槽場河藉以刷深民田可免泛濫查總六塘

河自駱馬湖永濟橋而來至安東流陽界分爲兩六塘
河兩河之間爲項碩湖舊皆有隄自乾隆四十餘年以
來日漸頽圯每歲河湖異漲潰決瀰漫附近田廬皆成
巨浸士民怨咨急於宣洩亦有逞刁之徒藉口救患肆
其挖決卒之商運有閣淺之憂民田亦被淹沒之害職
於三月間履勘南六塘兩岸隄形尙在北六塘則微有
凸勢約畧估計增卑補築挖深之費南約四萬餘金北
約八萬餘金國帑旣例難借辦民力亦不克蠲修臨流
浩歎仰屋興嗟伏惟閣下熟籌商運軫念民艱仰蒙垂
詢塘河西岸欲令商人置買其地任水游衍使民無爭

德至渥也第所費不貲而於勢未便不如興修堤埝飭
令商人蠲金挑築或於庫貯閒款撥辦非特場河漸可
深通居民免爭開洩而瀕河海流清安四州縣之地畝
廬居永無水患功不在召白諸公下矣如蒙見允卽將
現在約估清冊繪圖貼說先行通稟仍候委員確估刻
日興工卑職亦當操耒鍤以從事仰副閣下奠民利商
之至意

務爲長治久安之策 先生於民事往往而然

持謙記

濬吳淞江工竣善後議

竊照吳淞江爲三江僅存之水道。上以洩太湖之盛漲。下以避黃浦之洪濤。自前明夏忠靖廢而不修。頗有遺議。於是海忠介周文襄諸公。竭力疏治。功垂不朽。我朝凡三次興挑。經今又五十餘年矣。上游旣多壅潰。糧艘改由浦江農田失利。商船不通。瀏河又旋挑旋淤。執事仿照三江水利。詳定章程。先集經費。尅期興工。各就民董分辨。毋令官吏經手。法至善也。又慮民力維艱。不得不省畱而用之。是以原估寬不過十丈。深不過丈餘。而工段綿長。夫價優厚。已費民財二十餘萬兩。夫以數

十年積淤之江面所估寬深丈尺乃僅如此使挑挖稍有不足曾溝渠之不若矣且民間董事不諳工程抑或賢愚不一若任其所爲則弊端百出一加扶罰動稱民捐民辦官不得過問焉其何以藏成事伸冤以候補之員承督是役深恐事權不屬心力不齊是以不避雨雪不顧嫌怨日與邑令工員董事拊循勸戒具言吳淞關係農田水利漕運商賈數十年而一浚用民力以鉅萬計必須可經百年之久方爲不負此舉倘有苟且粗畧虛耗百姓之脂膏不有人禍必有鬼誅聞者無不震動恪恭幸遇一冬晴暖人情踴躍故能如限報竣執事親

臨勘驗較原估有盈無絀開攔湖壩則六十餘里之遠湖水不三時而至攔潮壩開攔潮壩則潮水一日夜而過崑山上海南匯川沙漕船隨潮銜尾而進昨所見爲溝渠者一轉瞬間已成浩瀚之觀矣沿江居民莫不贊歎爲從前所未有而薦紳先生相與作爲歌詩碑記以紀其事此由執事法良意美率作興事而牧令佐貳皆能盡心奉公與民同欲之所致也然仲冕竊有慮焉吳淞之久而必浚者以潮汐挾沙而淤也人言潮一日夜淤一錢之厚則一歲當厚三百六十錢不十年而淤平矣無以治之直目前之利耳治之之道有三一曰疏來

源使湖水暢大力能攻沙二曰除內壅禁江中茭草漁
斷使無停沙之處三曰建牐壩今於攔潮壩兩頭各留
八丈曹家渡亦建約水壩使潮來有禦湖流有力固已
然牐究不可不設乾隆年所建新牐不久卽廢者以距
潮太近牐孔太多司啓閉者不得其人故耳今於新牐
之西十里建三孔牐常啓者只中一孔潮來則閉潮退
則啓閉則湖水積高啓則湖水迅出不特潮不能淤江
卽牐外二十里河灘亦不能停留沙泥設牐夫若干名
命吳淞司巡檢專司其事以淤之有無爲殿最而以蘇
松道就近督察之庶幾百年之利也仲冤不敢因工已

告竣置身事外謹述執事經始之周詳與任事者之辛
勤而擬經久垂遠之策以追前賢之遺烈未審有當否
也伏惟執事裁之

先生熟於水利故能言之詳悉如此以此善後海忠
介周文襄不多讓也

特謙記

上制府書

八月六日准藩司咨奉劄飭知部議仲冕仍遵豫東例以捐足分發等銀兩上庫之日爲始試用一年補升調遺缺等因蒙此伏念自昔三吳陳臬之年已有十部從事之喜迨後資遷遠省引退僑居瞻望牆高自傷隅向及負薪之疾已平而埽門之懷倍切迺荷保留於宇下因人而成獲効奔走於階前於我已足今奉前因或謂補缺無期豈知卽事有漸筋力云邁肝膈可輸烏有甫膺提攜輒思超擢不顧躁進致詒姍笑者乎竊惟江南吏治廢弛有年自節相臨蒞以來率作興事舉措協機

宜黜陟準勞績是以人咸自奮功罔弗成上迓

天庥下孚輿望蓋操鼓舞之權而收指臂之效如此其神也然向者患在積靡今者患在躁競少年新進便跂美除掾吏貲郎妄希高位過一差遣早萌獎拔之榮偶爾緝逋遽書考課之最忘已量之所稱怵他人之我先在節相善善從長不憚飛章入告乃屬吏師師非度惟知捷足先登速化中其心操切害於政此其流弊所極想在洞照之中今仲冕亦以納貲而登薦剝敢復冀破格而予安便風化所關請自隗始補官固難躐等署任亦無覬覦但當竭力而分勞雖盡瘁而不悔也馬以御

而騁非徒芻豆之求鶴以舞爲材豈作璫璫之態惟望
節相不以庸猥相待而以靖共爲期以遂仲冕爲知己
用之忱而成大臣澄敘官方之善政也伏惟恕其愚瞽
而教之幸甚

全是忠盡語莫作求自試表讀也

持謙記

答陳藝菴學博書

世昌

客冬獲讀手書疊疊焉以學問經濟相推許且見詢民風吏治自問迂疎殊不克當爾時于役經年席不暇煖粗作復書尤孤下問春來肺病稍平繙誦來槭深佩閣下留心世務講求體用之學於正人心勵風俗培根本三致意焉鄙人雖不足以語此何可不抒所見以盡商榷之誼竊惟學問之道誠與僞而已矣誠由於克己僞起於好名克己者一念之萌有涉於自欺者必嚴於獨其發也過則爲狂不及則爲狃而皆可入道好名者一事之微苟可獵名者必暴於衆其究也在野則爲鄉原

在國則爲姦雄而要爲賊德謂三代而下惟恐不好名者殆非也名者實之賓亦士大夫所當顧惜不顧名義恣意妄行是小人而無忌憚然世所指摘尙可懸爲鑒戒好名則工於揜著以欺世害於人心毒於政事雖然好名者鮮有不敗者也不敗之造物必敗之矣故曰百僞不如一誠誠以立其本而後治人之方經世之業虛衷以求其要準時以酌其宜稱其才與職之分量以實心行之易曰有孚惠心勿問元吉民至愚而神若美言小數卑有以窺其微矣然則民之刁悍吏之疲玩豈盡吏民之罪哉菊溪節相才大如海長於用人事無艱

鉅無不立辦李贊皇張江陵之流亞也惜哉仲冕素乏
吏才所恃以事上撫下者樸誠耳年力就衰未能引退
大雅不以爲鮮耻而引爲同志且感且慙伏惟鑒其失
而匡正之幸甚

誠僞二字先生界畫甚嚴一生得力處亦卽在此二
字僞者徒自勞耳

特謙記

與許石華孝廉書

頃辱手書并令弟覆械情詞斐亹如親蘭欬令弟江陰之行想過淮時得圖把晤也紀年集證一書承見贈并索鄙論僕於是書所見與集證迥別然非集證不足發僕之臆見其繁引博通致足尙也韓文公云識古書之正僞與雖正而不至焉者昭昭然黑白分矣夫正者固無可議卽僞亦當求其所以僞之隱非無病而呻吟庶不爲九原作者所竊笑且千古作書之人白上聖大賢而下莫不有憤時嫉俗鬱壹無聊不平之辭迂折而歸於大道史公所謂非好學深思心知其意難爲淺見寡

聞道也如左傳史記之爲書大近道矣而左氏以周鄭
爲二國先軫鬻拳爲忠怪力亂神爲可信史公以項羽
爲本紀陳涉爲世家刺客游俠貨殖爲列傳夫豈不知
遺後人訾摘而津津樂道者如水之有激宕而後歸大
壑也有力若淺水無波反散漫而無所歸故其書不可
磨滅或謂書之傳不傳有數存焉僕則以爲理也而非
數也秦燔經而經卒存隋焚緯而緯遂絕古聖賢微言
大義維持名教人心如日月經天豈水火兵革所能殘
蝕者哉苟其不然無論奇譎平衍皆不待焚而自燬矣
造物之於文字鑒衡最精其悖理而傷道者旣不旋踵

也其庸庸者候蟲時鳥聽其自鳴自止若有不能直達
反言以伸其義使人凜然於名教慙然於人心則必存
之而不廢此竹書紀年之所以傳也集證意在尊紀年
迺曲爲傳會求其非之無舉而其真轉沒說詳論中今
往一通幸規其失又東海父老答問篇亦希正之球陽
璫語一則已補入手復不宣

讀一書必求其正僞是精細處亦卽是格致處他人

往往忽過

持謙記

與荆溪志局紳士書

仲冕爲邑長於斯者旬有九月矣不善爲政無所裨益
邑中賢士大夫憐其刻苦過爲獎許良用自媿又匆遽
赴調未獲臨歧話別悵也何如伏惟時和氣洽眠食安
熙無任徧祝吳江殷繁頗稱難治辭不獲已受印省會
十日始赴任纔兩日又鼓棹迎送席不暇煖飾厨傳勤
置郵幾無臨政視事之閒安望雅歌投壺之樂蓋無時
不惓惓於銅官罨畫間也陽羨爲文雅之藪名山水皆
隸荆溪自分治以來七十餘載未有志乘諸君子咸以
修纂爲急務屬仲冕同阮明府主持其事既有成局而

仲冕遷去夫事難成而易敗時難得而易失人或謂事
方權輿而吏適更替恐其不潰于成然巨室所慕衆志
成城考獻徵文大有人在豈係於仲冕一人之去留哉
志本古史之流體例當嚴武功靈壽諸志所以傳者得
班范之遺意今縱不能效其簡括亦未可沿襲繁縟有
乖史裁區圖賦役宜詳記載詞章宜慎褒善從長而不
宜濫考古貴切而不宜拘如鄉區必圖其村落里居以
覘民俗田賦必悉其沿革數目以立限制此宜詳者也
文之具見本末者載之列傳詞之足徵風雅者麗之山
川此宜慎者也安邱志立俾德傳不可學志惟稱美而

已然庸俗並載卽賢哲亦不光又分縣以前地名雖可
按圖而索人物究難刻舟以求且其人爲兩邑所爭因
而並紀亦足勸人爲善凡此數者皆諸君子所悉仲冕
不在其位猶璅璅言之冀效一得之愚以備財擇阮明
府風流儒雅兩學博文行兼修與諸君子蒐討裁訂此
書之精當可必也仲冕治行旣疎文詞亦淺薄不足採
別後數詩容暇中錄寄以志遠懷不悉

先生向譔海州志名輩交稱之謂足與武功靈壽兩
志鼎立而三茲於篇中云云乃知好處唯在體例能
謹嚴耳志乘家熟此可無關冗泛濫之失

持謙記

與某先生求爲母氏墓碣文書

承示序辨訓辭深切得直道之遺益信古文之作不惟其辭惟其義義有概於人心而辭且入古雖欲不傳得乎易曰初筮告再三瀆瀆則不告何敢更有所請然而資人之財患其無厭資人之教不患其無厭非教之輕於財也以爲教者無窮之思固若是耳且今更有所請者非尋常之教也仲冕不幸未冠失母甲午歲殯於岱西肥城之陶山又五年礪石植碣又七年始以授徒得金售祭田數畝架屋樹柏置守冢焉屢欲丐名碩爲文以表阡而無堦嘗效張憑自爲母誄礪石將刻輒復中

止懼文之淺劣貽吾母戚也今幸遇其人不以瀆請見
拒而猶不泣求焉於心安乎謹述母氏生平懿行別爲
卷惟先生財擇焉

表揚先德之文不得不如此鄭重

持謙記

與友人書

昨者紬繹所閱拙藝是正處可作數則古文讀足下引
爲同志仲冕實奉爲師由此緝續請益更望宏不倦之
衷多所批導他日或於斯道稍有知識則受賜良多抑
又聞古之取友者文章相師尤賴道義相勗有過則規
自古改過爲難聞過亦不易子馮從之者三叔豫方告
以所懼信陵自責無所容趙王始不敢獻五城故夫譽
言日至而讐尤不聞者非能賢也正坐內傲而友棄之
耳今仲冕涉於意氣諸君子愛之甚相與切切焉慮之
乃欲言且止遲之又久而後發則仲冕之不能痛自折

節可知矣甘言疾也苦言藥也繼自今如可砥勵有成
幸時有以藥石我擁篲清塵企予望之

竹因虛受益請爲斯文下一轉語

持謙記

復王湮書

頃奉手書退然居弟子之列僕前自云迂拙實非謙辭
况足下銳志前修焉敢抗顏不媿如以石爲玉錯願共
相切劘無規規形迹爲也足下云立志非不堅苦於氣
稟多濁夫立志眞作聖門徑考亭所謂志不立則無藥
可醫聞象山所喻由於所習所習由於所志以爲深中
學者隱微深痼可見志之所向卽君子小人所由分故
學莫先於辨志夫志未立者聞善而喜亦逐物而趨道
無中立終歸下流志旣立人禽之界較然矣然而搖之
者且紛然雜進於吾前凡附於身者皆足以撓我至於

豪情客氣有意近名似乎能立志者而實爲吾志之害
則立志難立志堅尤難聖人志學後十五年方臻此境
吾儕非繕志刻骨逐事縛嚮解不搖矣立志果堅又何
患氣稟多濁乎卽如讀書習舉業應科第思承歡顯揚
窮經致用此天理也若急求一第官誇耀父兄宗族
逞意衣食妻孥此人欲也理欲同途而異趣故辨志不
可不嚴而文詞爲之徵由理之志其文必守先正典型
體認書義多所發明由欲之志其文必軟美圓熟剿襲
聲調以希世諧俗方今崇尚經學以正文體足下文有
風骨加以經籍之光其逢時發越亦復何疑來書懇懇

惘惘僕無以爲益願仍以立志之說進

理欲卽人禽之界辨析精當學者當書一通於座右
持謙記

東海父老答問篇

東南河患旣平百谷善下瀕海瀉洄爲衍沃節相奉
朝命命有司審度周詳以賦民屬觀察使者董其役使
者前海州牧也至則耆老薦紳之徒逆於境使者勞之
曰余於海濱疾苦稔之熟矣潮所不至十年而生紅蒿
又十年而長青茸而後可墾然大潮三十年輒一漫其
歲得耕穫者與有幾且漣河未疏六塘未復沂沭西來
泛隰彌疇自夏徂冬前因減壩開桑墟溢湖河並漲民
保伊盧幸節相灑沈澹菑始轉而緣南晦今又從而征
之恐非疲黎所能堪也且奏請由司空讀節相覆奏有

云我

朝敷天置表罄地陳圖不與水爭地不與民爭利所以
遣吏經畫者慮田無科則而競錐刀耳則履畝而稅亦
非節相本謀父老儻以爲苦使者猶能力陳之於是鄉
老士大夫咸進曰公何慮之鰓鰓也家雖貧食毛則一
人雖魯被澤則同素樂薄賦輕徭屢蒙蠲租賜復一旦
拊諸淵谷返其田廬遂欲據儻來之業擁自占之貲稱
雄鄉里無益縣官苟有人心能晏然乎今不追從前私
匿之咎而豫籌將來萬一耗滅厥賦惟貞且犬牙旣劃
雀角自除由是我疆我理有幹有年所以爲吾民計者

至深遠矣而何弗堪乎日者議挽萬里之黃河挾微山
碩項而欲出於灌口改綱絕紐勢可滔天荒陬婦孺呼
號無門賴公致書大府以寢其事安堵如故由今思之
室家以完耕鑿以蕃老者得壽延幼孤得遂長將喜之
不勝而何苦焉抑又聞之尙書大傳云溝瀆壅遏水爲
民害田曠不墾責之司空戴記云司空執度度地居民
山川沮澤時四時量地遠近興事任力然則司空之請
盡地力籌國用乃其職也誰得而議之且夫地有餘利
民有餘力生穀之土未盡墾山澤之利未盡出者計國
者之遺策也昔魏入河水於圃田又爲大溝而引圃水

瑕陽人自秦導岷山青衣水來歸楚師出河水以水長垣之外漢世朔方西河河西酒泉引河及川谷關中輔渠靈軹引堵水汝南九江引淮東海引鉅定太山下引汝水皆穿渠爲漑田各萬餘頃夫至發卒疏鑿數百里僅乃得通甚或田者不能償種猶以爲利況茲水平上饒不假人力而顧聽民數斂乎公其悉心鉤稽毋事煦煦爲也使者的敬聞命矣於是益歎

朝廷惠澤之淪洽節相勤施之美取於民而不怨也未
有上好仁而下不好義者也吾淺之爲使者也

深識遠謨崇論閎議可以成子可以入史體製畧準

長卿其陳義甚高用心甚厚本有體有用之學爲宜

今宜古之文則迥非長卿所及

喬林謹注

唐人摹仿漢文者嘗覺流利處多於端莊此用相如
體格而氣骨詞義色色深厚似可度越前賢

桂林謹注

陶山文錄卷七

善化 唐仲寬 六枳

碑記

重濬吳淞江碑

太湖受浙西諸水東注爲松江繇亘三百六十里自湖東北逕七十里爲三江口東北入海爲婁江今爲劉家河東南入海爲東江今爲黃浦而松江爲經流松江又東逕八十餘里合大盈顧漚等浦爲四江口又東逕百二十里黃浦來會之又逕七十餘里入海爲吳淞口前明夏忠靖疏劉河三泖而舍吳淞百二十里未濬迨周

文襄等始議重疏至海忠介乃於平地開江復吳淞經流之舊民到於今稱之

本朝三次興治著有成效闕今又五十餘年矣潮沙漸堙港浦壅闕農田失利曠潦爲害漕艘賈舶改經黃浦風濤震驚嘉慶二十一年前撫部胡公奏奉

俞旨以工需二十八萬三千兩有奇於沿江之上海青浦嘉定三縣輸十之三同霑水利之長洲元和吳常熟昭文吳江震澤崑山新陽婁太倉鎮洋寶山十三州縣輸十之七率視歲徵糧額均兩年分徵於二十三年秋成時蠲輸如數卽興工今撫部陳公時任藩司詳定章

程令諸牧令甄選摺紳耆老分董其事其經理員役薪水簿書之資率屬蠲養廉給之不以絲毫耗經費檄仲冕與慮事往來察視故道通塞綜司催輸時載權臬司不敢諉經費旣集與蘇松太道龔公麗正秉承臺愔愔選僚佐仲冕躬至滬瀆屬其植受其要爰集上青嘉三邑員吏紳耆里甲而誓之曰上司重用民力江面估寬九丈五尺至十二丈五尺不等底寬三丈五尺深一丈至丈五尺不等較前三次寬深丈尺尤省脫或少有侵冒則數十年一舉之工徒虛糜矣耗民膏虧

國計微論法當獲譴如江神何於是官屬咸精白一心

民爭盡力畚鍤雲集鼙鼓弗勝時際暄和自冬徂春無
淒風積雪冷雨役徒常如挾纊訖於工竣其工西自青
浦之蔣浦築閘湖壩始中界嘉定東至上海萬安渡以
下築閘潮壩止計長一萬一千餘丈凡六十餘里析其
段爲五十有八爲土五十八萬六千餘方集夫六萬有
奇三月而畢撫部親履周閱檢覈原估之數有贏無絀
其積土皆在兩崖十丈外乃開東西兩大壩湖水下注
海潮上迎江流浩淼川沙上海南匯三廳縣之糧艘隨
潮而進沿江農畝自開支渠以資灌溉上游則剉茭荻
以暢其源下游則設束水重壩以禦潮又以餘力修建

瓜涇張姆二橋非天時人事之和會曷克臻此說者謂此舉有三善先徵經費而後興發無缺無逋信也計方受直多至四錢以上視他工倍優丁夫不戒白至仁也董以紳耆胥吏不得與令長稽財用互相糾勸公也公以行之仁以來之信以成之又得素諸程作之海州牧師君亮采酌機宜奠準繩勵徒卒上海工居大半大令葉君機倡以廉勤如式夙辦嘉定令劉君青藜青浦令李君鴻瑞皆率作有方襄事諸僚昕夕江干瘁躬拊衆故能剋期歲事怨讟不興以復三江之經流而爲田漕所永賴越明年歷伏秋大汛無壅宣具區巨浸無溢浮

附錄三金卷一
兩屆重運無阻濟旁邑旱田無涸撫部始以功堪經久
入

告蓋其審也雖然善作者貴善成善始者貴善終其始
也人疑力役不齊潮易淤而功莫就多方以撓之非大
府排浮議策羣材示民以誠鼓舞盡利仲冕亦安能藉
手以報命哉今旣作而成之矣其所以謀善後者得節
用萬金付質庫收息資歲修蘇松太道就近斂發庶幾
慮周而計密者歟土人謂潮汐上下日淤一錢厚一歲
當厚三百六十錢計丈深之溝不十年爲平陸則隨時
決滯疏淺載修舊牘勿種新灘是在終之以不懈者矣

余故舉其顛末縷紀於石以諭後之理是江者

吳淞之濬先生極費勤劬是碑及涇陽龍洞渠碑并
另刊石本寘長安碑林後之治是江者可以取法文
字之工其餘事也

持謙記

新開海州甲子河碑

中河舊引鹽牐清流經安東莞瀆至武障項冲受六塘
河而北滙板浦爲場河又自板浦歷卞家浦過孔望山
出海州東北爲新浦皆漦運所經工歸綱賈自孔望山
西至州城七八里舟楫所不通也城無市廛米薪缺乏
州以爲病今歲有以開渠請者余知其爲利而恐重勞
吾民也請者繼至始議董勸海州凡四十八鎮鎮各輸
財余躬爲植而屬矜耆分治方土綜其財用稽其功緒
東自新浦口引場入水西達城東門入於漣河計長一
千一丈六尺有奇廣六丈深者自七八尺至丈五尺爲

方三萬三千五百有三塹巖填谷戽瀦掀淖之力耒耨
綆缶木薄鐵石之具與夫算胥巡隸餽廩犒勞造橋關
隄立步凡用錢七千七百五十一緡五旬而成不愆於
素是役也適當淮河之間醴導紛紜場河亦大加疏浚
方慮發徵罕集歲事無期而四郊農忙不呼自赴釋耒
揮雨雲簇星奔不妨麥秋之時不憂水潦之降命之曰
甲子河且以名橋者紀天行重民力也夫十日十二支
相配窮六十爲一元而始於闕逢困敦此州十年已來
潮漸北徙故恬風渡最險惡已成平陸胸山以東郁州
以西得沙田數百頃更涉一紀地盡可耕石室諸生蒸

蒸向學耕者豐於野學者獻於庭其必自今河成之歲
始矣雖然漣河塞而青伊河乃東溢矣六塘隄不修而
大伊山南皆巨浸矣漣通潮易淤當設水門提闕之六
塘有南北二河隄逶迤數千百丈溝漑防淫費累鉅萬
且鹽牯遷清流弱中河每借潤於黃水沙停河淺輒泛
民田民與商爭蓄洩無歲無之凡此皆守土者之所宜
熟籌也豈特茲河哉是爲記

先生牧海州輯州志建考棚修石室書院治績甚著
此河其一端也州人至今呼爲唐公河以志遺愛

記

重修泰山上書院碑

日余主泰山講席者三年書院在城西門外市闕中每
苦其囂輒與諸生遊凌漢峯側謁三賢祠登投經臺倚
侍立石穆然想見三先生師友考道之遺風其東澗水
滌洞安定先生投書處也澗上有亭額以考槃飲酒賦
詩終日徘徊而不能去祠故泰山上書院余嘗謂書院
當移建於此以存其舊閱今十有七年聞書院已遷於
城內僧舍旁而門人蔣生大慶舉於鄉寓書賈理問培
榮來吳云年來祠宇圯廢亭傾石仆樵牧雜逕學者傷
之生倡議重修賈君慨然解囊偕同人鳩庀以董其成

新其祠堂創置配廳西偏構講堂三楹旁立齋廡起侍
立石樹之階前改建考槃亭爲石亭工經兩歲而竣以
復上書院之舊且曰此先生寤歌弗諼地也故不遠千
里索文爲碑余惟爲道與作室無異作室者立其基正
其宇高其閭閼厚其墻垣後之人修之葺之廢則改而
鼎新之所謂善建不拔者也爲道亦然今夫濂洛關閩
之道三先生實始基之孫先生以復性爲本石先生以
守義爲宗胡先生以明體達用爲要皆力排詞章功利
之說直追孟韓爲吾道倡於宋明爲創於鄒魯爲修是
以聖賢之門戶堂奧恢宏至今余竭蹶吏事學殖就荒

蔣生之於道吾亦未知其何如而以寒素之士任修舉之役賈君作之岱人士從而成之使數百年名賢勝蹟燦然一新生儒講貫得所游息抑亦有志竟成德不孤必有隣之明驗也余母墓距岱百里而近他日歸守邱壟當復從諸君子往復登臨瞻仰庭宇歌誦餘韻因欣然而爲之記

卽修舉以悟道所謂道不遠人也

秦小峴

太湖廳改建土地神祠碑

周禮大司樂有致土元致地元之文地元爲地神土元爲五土之神卽社也社字從土從元山堂考索謂社爲地元之屬而非卽地然對郊言社則爲方澤爲大社爲大元在北郊非天子不得祭與稷言社則爲土穀之神在庫門內邦國皆得祭之祭法所謂王有大社王社諸侯有國社侯社是也記又云大夫以下成羣立社曰置社又曰仲春之月擇元日命民社又州社一州所祭里社一里所祭社雖有大小廣狹之不同皆所以神地道也今郡邑鄉野各有土地神祠非所謂國社置社州社

里社歟周禮云社之日涖卜來歲之稼疏云春祭社以祈膏雨秋祭社以報豐年祈以載芟報以良耜所繫於民綦重謹按撫民同知有郡體所建土地神祠蓋置社也太湖廳廨東偏舊有祠湫隘不足以妥神靈吾鄉羅君琦撫太湖之三年徇士民之請蠲廉奉爲倡衆率錢助之改照壁內之通衢於壁外其南頗宏敞市民屋撤而新之移建神祠殆所謂孔曼且碩萬民是若者耶羅君由內閣中書擢撫是邦以經術飾吏治自丙子歲創建文昌祠旁置學舍俾士子肄業其中公暇親爲講課文行蒸蒸嗣修施巷河殿涇港橫港馬家底石岸甌路

設以欄杆濬射鶴山西南河道增高石橋以通舟楫由是往來吳門者不經太湖無風濤冰凌之險且洞庭西山湖面遶濶萑苻出沒乃多造邏船以資巡察而弋獲之凡此興利防患皆羅君實心善政紳耆士庶好義鼓舞以成之也而羅君曰吾何德以堪之非神眷茲土默宰陰助之力不至此是舉也有祈焉有報焉有由弭焉弭也者弭曠療昆蟲之菑札瘥戕賊之害也報也者報大庇吾民百廢具舉之功也祈也者祈履豐長世康樂安和之福也夫萬物尊天而親地昔所云社公社母卽今土公土姥公爲后土母曰富媪然則土地雖有大小

廣狹之不齊其爲子育羣生則一也此羅君之所爲歸
功而報德也祠成廳人士請紀於石爰爲之記

土地二字疏得明晰且說得鄭重非徒矜博奧也

謙記

重修龍洞渠碑

道光紀元歲辛巳秋九月大中丞靖江朱公以涇陽龍洞渠爲涇陽高陵三原醴泉水利歲久隄壞涇入沙壅閼無以溉田請借帑修治選能者洛川令田鈞爲植涇陽令恒亮司財用鄜州牧鄂山董其役奏奉

俞旨卽於是月興工明年閏三月竣事開牐試水流大暢行當書庸入

告矣余職旬宣爰泐石以紀成績其詞曰

在昔鄭國鑿涇水自中山西邸瓠口爲渠並北山東注洛白公於其上游引渠東南行入渭溉民田者皆數千

萬頃厥利溥哉唐世除礮磴決支渠開六門堰歲收杭
稌三百萬石宋時自中山鑿高處瀉水修三白渠橫木
格石爲豐利渠元鑿山爲新渠今稱王御史口龍山之
泉出焉明項忠穿山爲鐵洞曰廣惠渠蕭翀復鑿山爲
直渠接王御史口下爲通濟渠蓋自宋以來涇下渠昂
鄭迹久湮泥壅流塞白工亦廢涇之利轉爲害矣元明
疏泉以行淤如篩珠碧玉鳴琴諸泉滙爲天澇池迨余
子浚鑿龍眼泉其顛浚巨井龍洞之名昉焉我

朝雍正初年總制岳公爲官高水隄石隄土隄各數千
丈故相查公以涇夏漲敗渠害苗就退水槽建牐啓閘

置通判山南司其事蓋自龍洞渠興令人不復思鄭白也乾隆二年以學士世臣言增堤作壩屏龍洞北口遏涇毋令壅渠疎渠二千五百六十丈有奇溉四縣田七萬四千餘畝豫籌歲修之貲設水夫三十人給廩食於每歲秋杪修之補之俾勿壞於是人知涇泥濁易壅非惟弗引且嚴捍之泉性煖宜稼非惟勿涸且博按之近歲值涇暴漲兩山夾峙水高數丈往往漫渠漲挾沙石衝激堤堰亦頽然吏民輒率錢補苴不煩公帑至是連山石岸傾入涇流渠泉橫洩而不下注淤澱爲陸凡石隄壞者七十餘丈土隄二千二百餘丈慮功計值當二

萬一千兩有奇民力未能辦愁置之矣鄜州牧今遷西
安守鄂君山親履阡陌謂渠何可廢勸民籲借帑金二
萬兩分五年均於受水之田徵償及工興而夫徒趨赴
尅期集事西安守遷安肅道劉君斯嘯周覽具報自三
龍眼以下石條排比以鐵餅嵌合條以鐵柱貫之土隄
如式不愆於素惟天滂池石性易裂難固乃依山鑿偃
月新渠深四丈長五之上橫石梁兩旁迤邐壘石闌水
入渠又獲二新泉漢湧與節珠泉埒又於故隄未壞者
距新隄二丈許以土石闔平爲保障自是捍涇極堅撥
泉彌廣實田大令本謀也當始事時渠幾廢經鄂太守

諄諭而後從及鑿新渠沮者同聲田大令毅然行之迫
臻厥成翕然稱善儻所謂可與樂成難與慮始者耶先
是通判改設縣丞今卽付以善後所宜考其殿最是役
也田大令專之恒大令往來左右之劉觀察鄂大守鼓
舞而成之故能歲數月之功而垂百年之利君子是以
知中丞公舉人之周也與人之壹也余樂得詳記之以
詒後之人

關中水利以鄭白渠爲稱首所謂涇水一石其泥五
斗且漑且糞長我禾黍豈意數千年後涇反爲渠患
乎此舉由中丞能用田大令而有成勞余適履任宜

爲之計功稱伐也然余竊疑泉之爲利必不及涇之
大涇之泥何以昔溉而今壅儻鄭白再來未必不可
復秦漢之舊因憶前在吳門人多言吳淞江不可疏
自夏忠靖已專意瀏河矣及疏江事成衆論始服特
患善後無人耳或者涇河亦若是乎此碑已勒渠首
復書一通並錄吳淞江碑置之碑林以寓意文與書
法不足論也載跋

余未至涇陽讀此文如身履其地固由先生熟精水
利亦以文筆曲而能達

持謙記

朝邑縣重修文廟碑

代

聖人之道炳於六經成周立學造士之術不外乎是其道自天子至於庶人皆備其業自少而壯而老皆有次第其地自族黨鄉閭以至朝廷郊廟皆循則臧違則否由之而深焉窮理盡性以至命次之亦循循雅飭康色好德文章其餘事也漢承秦燬經傳晚出於是訓詁之學專門名家廣立學官而窮經致用之義或幾乎隱矣然其時斷大疑定大計修明大典往往引經決策而著述之士猶有以道相高者魏晉而降剽裂以爲詞章昌黎韓子始約其旨而成文而宋世大儒潛心體認抉經

之心聖道以明經義取士大勝詩賦以四子書爲目而
以易書詩三禮三傳之精意闡明之此誠足觀人學識
矣乃其流弊分文析字煩言碎辭比附佂離以矜淹貫
甚且牽引子集雜援內典夫以聖賢載道之書而徒供
文字之用又取悅有司之目而以掇摭擣搯爲工是文
體蔽卽經術之日蒙經術蒙卽人才所由雜也此無故
上旣徒懸功令而承流者又無以振興而倡率之也我
國家文教覃敷學校修明

皇上敦崇經學特令以五經取士風行海流東漸西被
壬子之秋奉

命典試秦中朝邑大令遠峯朱君司分校余素知其學有原本相與商確去取揭曉得朝邑士二人因悉遠峯之爲宰不爲繭絲而爲保障修城郭置書院文廟經六十年未修黜俸倡之邑人士襄理之期月而考大成門故一楹拓爲三楹崇聖祠由東偏易建殿右又以餘財創修學官署署故有西河書院因設明高侍御程護軍二主於其前廳以追崇忠烈使遊於宮牆者皆有所觀感興起爲黎庶導然後信經術非迂疎如遠峯者能宣布雅化而邑中良士皆廩廩學道以德行道藝書於鄉而達於朝而不爲陋率浮薄剽襲之學於茲可信廟成

陶山文錄卷七

五

邑人士請記於余余辭弗獲故記之

堂堂正正是爲切實文字

孫淵如

蛇邱唐氏譜碑記

敬宗收族之道莫善於譜亦莫難於譜莫世系辨昭穆
萃數千百年已渙之精神聯數千百里未屬之支派俾
子孫毋忘其源毋墜其緒故曰善也然大有難焉者求
已往則無籍可考收已散則無獻可徵甚且近舍戚情
遠通疏屬此務合併彼樂乖離旣築室而道謀又治絲
而棼之故以數世數人成之而不足以一人一事壞之
而有餘此蛇邱唐氏譜碑之所由建也唐氏郡系晉陽
晉昌皆出唐莒公後枝分派別蛇邱則自洪洞來遷者
始遷爲光輝公四傳而爲英奇二公英公後無聞今之

陶山文錄卷七

七

蕃衍昌熾者皆奇公子孫也世有孝秀科名屢登仕籍
前此亦嘗詳著族譜矣近因附投訟牒遂致失傳增廣
生員際虞年且七十憫其散佚旁採博詢名字必錄妻
女並詳子姓蟬聯本支碁布疑者闕之斷者續之使前
譜失而復存其用心可謂勤矣又懼其遺佚也於是刻
石以垂永久適余以上計展謁祠墓於陶山因屬余爲
記余家亦宗莒國分支旣遠譜難強通先大夫與其先
學博友善以年相若爲弟昆及先太恭人葬陶山爲同
縣兩家遂不啻同姓矣迺不辭而記其顛末焉使世世
子孫皆如此用心則雖合千百年之上如一日千百里

之外如一堂可也詎不善哉

論譜之難是有見識語文亦疎宕有逸氣

伊墨卿

古浪縣重修龍王廟記

改錢兒作

龍神水君卽雨師也古稱淵泉所在皆有龍司之能出
雲爲風雨故曰神古浪故漢蒼松縣班孟堅云縣南山
松陝水出焉北至搢次入海漢搢次故城在縣北今名
古浪水也又長泉水注焉城河卽谷水之下流大河頭
渠在縣東南三十里縣境有七渠共溉田五百二十餘
頃水濡則稔涸則歉興雲致雨龍之爲靈昭昭也城南
舊龍王廟倚山臨水神應顯著每歲六月禱賽雲集列
肆演劇民大和會自嘉慶三年爲山水激蕩神殿僅存
期會衰歇歲亦累荒錢以禱昧來宰斯土惟冀得歲少

免誓尤今夏兩月不雨旱氣蘊隆自知瘵曠爲神所訶
然念神必仁愛羣生當不因令失職而忍視其飢困乃
齋心叩禱甘霖立霈藉獲有秋非神之宥錢而福吾民
曷克致此於是邑士庶咸曰百室賴神以寧而神居顧
敝壤不修况邑長曾以興建致禱而親爲之倡乎爰相
與踴躍蠲輸鳩工庀材刻期訖功廟貌巍然聿復前制
以答神貺令爲之紀其事考邑近邊徼唐宋不列版圖
勝國屬衛置所我

朝改設今縣而嘉峪以西拓地二萬餘里蓋昔邊而今
腹矣忻逢

聖天子百靈効職萬邦屢豐獻享交神積和塞明故能
使遐陬蒙庥祈報昭應若此也錢奉職無狀感神人之
交暢敢不敬夙夜以奉薦馨香是爲記

通首雅健深得立言之體

郭麐讀

如皋縣學重修尊經閣碑記

養士以學教士以經經不明而學晦經不尊而學卑學
晦則士無文學卑則士無品曾子曰尊其所聞則高明
子思子曰尊德性而道問學道固未有不尊而能明者
也三代之學經與道合春誦夏絃秋學禮冬讀書自離
經辨志至於化民成俗蓋瞽宗上庠之教尊也漢時方
正賢良文學詩有申培公轅固生韓太傅書自伏生禮
自高堂生易自田生春秋自胡毋董生以次列於學官
置博士弟子太常試一藝以上補文學掌故高第爲郎
中董子云諸不在六藝之科孔子之術者皆絕弗進可

謂得尊經之旨矣厥後抱殘守缺黨同伐異甚且傳會
改竄以文其姦而經與道乖矣嗚呼此不知尊經之弊
也由是言之經與道合而經尊經與道乖而經且廢是
故荒棄非尊日手一編亦非尊也佔畢非尊訓詁考訂
亦非尊也譾陋無文非尊箋積藻繪爲詞章亦非尊也
尊之者於易得剛柔之用於書得修治之方於詩得性
情之正於禮春秋得倫紀名分之宗因以契古聖賢敬
慎篤實克己服物之道在家爲孝子悌弟居鄉爲慤士
端人庠序推爲醇儒州郡欽其碩彥孔子曰六藝於治
一也禮以節人樂以發和書以道事詩以達意易以神

化春秋道義本之以涖官行政豈尙有曲學阿世之誚哉如是以尊經則經尊而士亦尊矣我

國家崇學校重經術近又以五經取士昔之所謂株守一經駢枝他經者今則旁搜博覽矣雖然專經慮其拘墟全經又慮其泛涉得吾尊之之說而後無負乎

朝廷之作育師儒長吏之獎誘而爲經明行修之士也如臯學舊有尊經閣雍正十年乾隆十五年歷加補葺迄今六十餘年日益圯嘉慶十一年前令左君元鎮與教諭某訓導某集邑中士大夫議籌重修以財用不足而止十五年冬董其事者朱大剛等復率錢鳩工於十

六年正月始事訖年終而竣高廣楹楹之數悉如明葉
福清所記可以度卷帙可以列生徒亦可以壯觀仰閣
成兩學博請記於余余惟士之品本尊也汨於功利佻
達而失其尊當返諸經以正之經之爲書至尊也蒙於
溝猶沓儒褻於暖姝勦說故立之學官建之閣以表之
君子入廟生敬過闕則趨瞻斯閣也其亦有高山之仰
師保之臨乎周禮曰師以賢得民儒以道得民願吾牧
令以經術飭吏治諸先生以人師爲經師俾諸生蒸蒸
焉拳拳焉興於經學非特諸生之責也經以道尊士以
經尊邑人士多穎異當無謂余言爲老生常談而怒置

之高閣也是役也左大令倡之諸君子繼而成之例得書名以勸來者

至言高論知者鮮矣秉綬每以詞章攷訂之非讀書人其要在敦行而功在慎獨

伊墨卿

大覺庵建况公祠記

仁聲之人人深也歷千百年如一日碑在口尸祝在心
奚必竭蹶而成之端冕而祀之然詠勿拜於甘棠瞻有
斐於棗竹思其人猶愛其樹焉有芳躅可尋而顧棄之
蕪園荒刹乎吳自昔多賢守自况公出無論知愚貴賤
至於婦人孺子莫不稱况青天雖韋白之賢不逮焉美
名溢於江淮軼事播之絃管豈非其感人之深有莫知
其然而然者耶漢書循吏傳云所居民富所去見思生
有榮號歿見奉祀明史載公卒於官吏民聚哭爲立祠
宜乎俎豆徧於吳門乃自郡學有祠而外不少概見而

聲稱到今又豈非所謂碑在口而尸祝在心者哉大覺庵者公嘗以祈禳有應重修五顯神宇豐碑存焉好事者復得辟彊館記碣蓋公自記奪情時居廬其地爲唐顧況宅故以辟彊名館頗與史志小有異同於是博聞之士證爲贗作其辭甚辯真與贗不足爲公重輕也雖然與其過而疑之寧過而信之又安知非神誘其衷假手以歆起後人耶余權郡日卽思表章匆匆受代未及興作今吳縣孫刺史以赤繫首劇日不暇給之地蠲奉建祠闢園亭以供遊燕苟非風聲臭澤曠世相感安能雍容閒雅若此且吾聞公之爲政也立條教蠲煩苛免

抑配寬逋賦除官糧里長之累減漕米征布之繁鋤豪
強植良善民奉之若神又以其時崇禮學校振贍單寒
篤於故舊故生則民依依不舍沒世而終不可誼也今
刺史之宰邑也斷讞大堂觀聽悅服判牘無留取民有
制聘名士禮賢者雖與公時勢不必盡同要其孳孳愛
民之道固已見大意矣由是不懈益虔非特昔賢芳躅
藉以流傳卽其仁聲善政亦可復見於今日也不寧惟
是又使來遊於祠館者皆動其馨香之慕勉爲循良以
福吳民則公之靈爽實式憑之豈僅修舉廢墜爲美談
哉刺史謂余曾宰吳屬爲之記臨文省已有媿色焉

瀟灑軼塵一結更冷然絃外
郭麐讀

重建萃景樓記

狼山之有萃景樓也所以表山川之奇勝攬江海之恢
圖使千里膏壤萬頃雲帆咸會於軒檻之下陶隱居云
狼五山對句章岸登斯樓而後知萃然峙秀於江海間
者非惟州郡之雄抑亦吳越之望也余嘗以爲山面析
木之津其形銳圓類奎木狼宿故山以狼名四山則劍
金軍水馬鞍火黃泥土環拱中峯孝經援神契云奎畫
主文章宋史五星聚奎天下文明山與虞福對峙金焦
遙屬此崇州文物所由與金昌廣陵埒也山巔舊有支
雲塔泗州大聖殿塔前爲江海神祠祠前卽爲山門明

嘉靖中州司馬舒公纓爲其壅闕未暢也撤山門移置於前因其址而樹之樓名之曰萃景自有是樓而山若加高矣

國朝乾隆三十九年樓燬於火鄉宦王景獻倡修之五
十三年又燬延及塔殿祠宇僧舍無一存者五十七年
州牧李公逢春始屬州紳程君廷璋同諸士夫勸蠲興
造五十八年大聖殿成六十年支雲塔成嘉慶三年江
海神祠成增建六魁亭於大聖殿之右方亭於左又增
建東西廳而萃景樓猶瓦礫也工鉅而財不足故未歲
成事十二年余領是州因木棉互賈願以緡錢之二釐

助工請於上司許之重建樓三楹又向神祠爲報賽臺
形家言第一山門爲負狼木其次爲巨門火而樓又最
高故屢有火患宜設二山門稍卑則樓爲祿存土火伏
而土生金得地利從之今年冬樓成衆工告竣器用畢
具周山爲繚垣蓋閱二十餘年而始輪奐如初也綜計
經費凡三萬八千八百有奇自嘉慶元年以來皆程君
一手董理且云率錢不敷稱貸益之可謂選事獨賢矣
考泗州大聖顯靈於正德中擒文安巨寇及壬寅之災
像以沈檀不焚人咸異之江海之神則興雲雨靖波濤
皆民所仰賴也況乎上符列曜下蔭羣生爲

國家毓楨榦之材以著鍾水豐物之庥不有大壯修廢
補偏奚以稱偉觀而宣福應乎余忝司牧幸藉山靈庇
我士庶故樂觀厥成爰述其始末而爲之記

似匡稚圭劉子政文字在集中另一格

持謙記

泰山書院三賢祠附宋趙兩先生記

自宋孫明復先生教授泰山學者翕然宗之始闢學館曰信道堂以岱祠廣墀基迫其居乃遷凌漢峯下當時海陵胡安定先生亦來講學故有投書澗遺蹟蓋今世所指講書堂卽泰山上書院也後人祀孫石師弟并安定爲三賢祠由來已久三賢旣沒濂洛關閩之學浸衍浸昌而泰山之嗣音杳邈者且五百年汔勝代萬歷間宋繹田先生抽簪歸里開青巖義社與東林諸君子相往復一時英彥多從之遊亦越我

朝趙相國仁圃先生成進士後仍其舊社獎進後學而

蔣中丞陳錫爲易名書院招徠四方同志一時稱盛事焉人之堂舍漸圯當事者還之宋氏置今書院而額以泰山以是考之青巖者宋書院之津逮而今書院之權輿也今書院自門徂內舍後榮凡七重其第五重爲講習堂堂後爲文昌祠東爲三賢祠每朔望則師率弟子拜謁亦循程董學規也乾隆辛丑余謬塵講席復與纂修邑乘之役徵掌故溯淵源得書院創述之顛末喟然曰莫爲之後雖盛弗傳宋趙二先生所以遠紹三賢近逮來學者豈其微哉因念魯人重泰山徂來教澤爲立兩先生祠又以安定同時講學益之爲三賢祠其後仁

圃先生闢書院設宋先生祠堂則尸祝之俎豆之固秉
彝之好亦禮以義起也語學博周君桐作木主題兩先
生名秩以壬寅五月端一日妥於三賢神主之陽稍北
向明曠數百載而相師於戲懿哉余旣藹然躡兩先生
之後塵媿無萬分之一足爲同學他山竊願奉兩先生
爲型表勉勉循循以漸至於三賢之精醇正大而上窺
鄒嶧洙泗之門墻庶幾能自得師歟行將歸侍菽水讀
書先人之敝廬他日者老師宿儒能發明三賢兩先生
之遺教而光大之仲冕且負笈以從因書以志之

先生主講泰山書院最久教澤所及至今都人士猶

嘖嘖稱之蓋隱以三賢兩先生爲嚮往不徒敷衍了事者觀於結尾數語益見謙抑之懷詎若夜郎自大者哉

持謙記

東理齋記

歲在辛丑麥秋旣食新從游者強半歸余日獨坐齋中
乃以書招何星田至語及學星田曰左右圖書窓戶燭
潔無塵樂哉讀書乎余曰樂誠有之抑以爲大可懼也
當夫百端膠輶儔衆紛紜囂處不可脫遁一旦置身岑
寂偃仰一室中與古人對晤非樂而何此而不自知其
樂是必富貴功名聲色貨利束縛之而後爲樂也然余
以謂可懼者固卽此富貴功名聲色貨利也學者亦誠
知陷溺之端只此數者之爲之耳又烏知其侵軼我者
尤在無形中乎蓋嘗幽居而默試之矣仁義中正之根

於性幾經汨沒而僅存者什二三耳夜氣初萌則富貴功名聲色貨利之私若乘間而抵隙也若風雨驟至而馳會也所謂僅存焉者避之若逃威然其來也無端牽引叢集至若無可爬梳當其據我未堅避者猶待其少殺而來復寢避寢滅什二三且無毫釐矣言念及此能無懼乎星田曰君知懼矣庶幾其不自蹈所云也余曰昔謝上蔡請益程子教以靜坐今余非靜坐固不足以知此無如質素昏懦將明知而故蹈之則力行之難也雖然竊願誦所聞焉孫卿之言修身曰安燕而血氣不惰束理也謂檢束於義禮也必有所閑外物無自而閑

人兵家言善戰者必先善守獨居固天人交戰矣此論亦善守之道也星田曰善余退而思此言之足爲宥坐也因爲名齋而銘之俾蚤夜得覽而愆焉銘曰

靈府孔虛義則居之官便乃佚禮則律之惟義與禮克全天理毋俾恣欲朋從於獨神其汝矚汝慙不憚將終隕於深淵是用銘旃

克已復禮之後往往有此境界先生是過來人語持謙記

登南嶽記

衡山爲壽嶽歲九月往祈親年裏糧步行過昭山二百里見羣峯護擁峯尖皆紺一峯東向屹立雲端疑卽嶽也問行道者知爲紫蓋峯少陵云紫蓋獨不朝爭長巉相望信然至嶽下廟市喧囂招梗唄誦香霧氛氲入廟頓首卜琰仰眡丹繪杳怱鬼物青紅靈象有赫明日出廟北門歛雲泄霧靄晦溟濛想如羅含所云非晴霽素朝不見其峯念已行不敢却步逾接龍橋經赤帝峯石磴鱗次或題直上南天或題雲梯皆擘窠深刻飛泉懸瀑琮琤道周經彌陀峯至自卑亭故半雲亭也晉桓元

記云垂柯跨谷俠獻交蔭曲溪如塞已絕復開如是者
數得芙蓉峯水經注容峯最爲竦傑望之蒼蒼隱天憩
半山亭雲陰解駁突兀青空望天門咫尺矣又越嶺至
丹霞寺有石題敲冰破凍今古奇游興會可想益鼓勇
金簡惠日兩峯間上南天門與泰山記所云十餘步一
休頓不避濕闇前有燥地目視而兩脚不隨者將毋同
其側瘞一殞於風者登高臨深可爲吁駭南天門上俛
睇脚底諸山幾於邾婁莫辨折而東北上幽崖翳蒼野
荔爛紅紺字觚稜迴出六幕金頂斜射夕照晃晃如霞
魚梵悠然闇黎遲客則上封寺也昔朱張所謂板屋者

今一名藍巨剎矣長老欲悉易鐵瓦因施一片苾芻導
往祝融峯寺右循泉視而上里許至焉泉發祝融峯背
石罅中涓涓流入上封齋厨飲可數百人雖盛曠沍寒
不蘸盛宏之荊州記云峯上有泉飛派如一幅絹分映
青林直注山下蓋爾時尙未有視耳山松盡虬屈癭拳
或生昔邪則摧黥於風霾使然祝融峯爲絕頂嶽帝殿
甃石冶鐵以爲固後有六祖像皆局於地不能宏麗殿
南蒼石窿起歸鬼如冠切雲登覽南天雲霞低偃環綴
不知其幾千尺也羣山伏地如聚米湘川九向九背如
曳練如曲蟠洞庭遠如甌與捫碧落而絕紅塵殆非人

間世昌黎云南方之山巍然高而大者百數獨衡爲宗
豈特南方哉苾芻指某峯獅子某峯象鼻七二但舉什
一且僅隱約得之况能一一躋臻乎少陵云祝融五峯
尊峯峯次低昂求所謂石廩天柱者雖莫能知然自紫
蓋外無不俯首帖伏而拱赤嫫怒之神回顧峯後諸山
戈鋌矛戟萬馬羸馳自回雁峯來真所謂炊吸領地靈
瀕洞分炎方也下叩羅漢洞過會仙橋踏試心石迴探
觀音巖羅念菴讀書處水經注云東有仙人石室學者
經過往往聞諷誦之音疑卽此時日入西崦矣乃宿上
封寺寒甚圍爐長老置茗共話黃獨紫皺堆盤纍案且

多不知名者正無心懶殘芋火也星月窺窓以爲五更
可望日出及曉鐘動急披裘起則寒霧衝人對面不見
山少時聞父兄快言觀日之奇頗恨緣慳山僧曰此宜
長夏非秋露新霽時所得見也然昌黎不云陰氣晦昧
無清風又云須臾靜掃衆峯出乎無已強至望日亭杲
杲者已與山顛平矣是爲岫樓峰亭中科斗倒薤鸞飄
鳳泊照耀琳瑯則禹碑也初學記云禹治洪水血馬祭
衡山遇蒼水元夷使者授金簡玉字之書此碑後人從
宋何子一所撫於岳麓者重刻於此亦自奇古絕倫坐
玩久之問鄴侯書院安在僧曰南天門西六祖道場亦

在焉問魏夫人黃庭觀曰在雲居峰問朱張所僑方廣
寺曰蓮花峰皆近在十數里遠或數十里恐扶鳩之倚
門也乃頓策巖阿假足輕輿而返

靜讀一過勝披宗少文臥遊圖也

持謙記

遊肥城牛山記

乙巳霜降之辰蛇邱李子止庵以書至具道牛山紅葉之盛招與偕游忽數日風雪乃以十月一日赴陶山展墓歸途取道過止庵謁其堂上父子舅季子姓之坐立雍雍如也譙語甚洽與止庵策馬登山煙村茅舍雜綴澗阿山口文昌峰有閣卓立如單檻椽筆谿水逕其左稍北爲印山平阜上正一柏亭亭植其中若螭紐然西峰一石峭直如圭金章玉瑞置几案前山亦極竒窈窕貴之致矣約六七里三渡溪水始入山望彌巖綺柏積翠籠雲不知馬蹏之緩也循西峰下至同川書院同川

先生者止庵四世祖大柏臺諱邦珍明萬歷時告歸引族黨讀書有聚樂堂堂前老藤盤屈如虬螭攫拏葉如髯鬣垂檐桷若浮思堂後爲先生祠堂仰其塑像戟冠豸服穆然典型祠祝烹茶以進味清冽不減泰山醴泉則龍沼泉也沼亭於祠左方池清深盎然涵演云常時水洑行繞堂前穿蘿激石致可玩西北上叢樹堆碕樵逕寬交入鳴漸深岫壑轉密迴視來蹊若不可復出但聞幽鳥相呼風谷潛應凡歷數峪類皆幽岑冥緬其上石大數屋若相傾捍崖則紺赭深碧如鏤彌勒應真者數十余曰此當名空現巖也循巖東下至中谷相與坐

盤石玩流泉激塋見骨下視石子如樗蒲止庵回首指
北峰以示曰窮秋勁飈俊鵲欲颺眠之則其上一巨石
如鷹喙東僦聳翮欲脫鞬而起稍西爲木頭塔又西有
仙人石又西一石如人舉袂拱揖曰迎仙皆約畧嵐翠
中下至牛山寺棟桷壯偉雖摧圯猶可想當年宏構文
殊法相騎狻猊皆范銅爲之相已墜龕前矣殿下有宋
熙寧碑題鬱葱山資聖院記畧言真宗東封更山名而
建此院熙寧甲寅始重修之碑弱半瘞於土撰書人名
氏不可識文中數稱庭堅按書院垣內嵌一詩刻云留
題鬱葱山資聖院落石泉太守少卿通理郡事茹庭堅

熙寧癸丑年上石蓋卽其人也寺西有金牛洞門爲土
壅蛇行而入數十武高可拂冠廣方十笏折而東北陰
黯不可測投之石砰洶不絕人言可通陶山一洞間有
持炬入者亦不敢窮其幽邃仍上西峰選石傾觴遙矚
平野柿葉盡爲滕六異二所掃除而眼前古剎蒼林錯
以霜棟疎柳絳黃烘染與夕陽相激射天然雲林石田
畫幃矣牛山峰嶸四周藏奇蘊秀層裏節束如蕉蘤引
人漸入佳境不必紅葉也寒晞西墜酩酊而歸登印山
西睇暮煙啼鴉中隱見鬼戕當右巖缺處指以語止庵
曰此非陶山乎他日耕牧其下守先壘當與吾子遙結

比隣也返則月滿平疇李翁皤然待門外益動我倚閭之感矣此非齊景公之牛山也游而樂樂而愴然至於
賈涕觸緒生情有不知其然而然者豈在林壑哉

記名勝山水非熟誦桑經鄙注不能象形惟肖

秦小覲

采菊東籬下悠然見南山不圖於此文遇之

持謙記

連楸軒記

壬戌歲由江南量移江北置寓館於鍾山之陽越十三年自崇川官舍移家焉庭故有紫薇丹桂數株惟木瓜兩樹並榮爲百年以前物也徘徊其下見其雙榦矗立五尺以上枝柯交合無罅開而復合如是者七以至於杪爾雅木瓜爲楸而高倚南軒因名其軒曰連楸孫淵如觀察爲篆其額客有靳者曰木連理見瑞應圖韓子以爲氣之交暢且楸之言茂也先生之德維時楸哉吾能詳舉如連理之數夫職業竭蓋建樹培化鄉材楸矣興學劭農與民樂利棠楸楸矣孺慕風木追養焚黃松

楸林矣皓首孔懷擎蹠孫順棣華林矣鴻案相莊義方
纁後玉樹林矣廣庇本根不遺宗黨行葦林矣朋舊彌
敦士認闢然金蘭林矣夫理者倫理也連理者篤於倫
而孚於庶物之徵也積和之所致也主人曰余之稱斯
軒也以爲則也而近于夸宜來客之靳矣且夫年近懸
車而不退止者上官之優容也治無善政而不怨惡者
民俗之敦龐也先壟隔千里而不能爲少游伯兄長十
年而不善爲君實妻子未得常聚宗族交遊未盡周卹
七者無一焉何由蒸爲休和乎語云見祥而不爲祥反
爲菑對嘉樹有慙德有惴心矣余將以靳爲規故記之

衍說楸字一段直如八寶樓臺絢耀心目實亦足以
福之非自譽也

持謙記

海石堂記

海石堂者松江太守魯公謙菴所建王公若園重題其額者也其石突兀玲瓏層巒疊嶂蓋宋元間自海上移來者明嘉靖癸丑有巡按孫公題怪石詩刻石上凡三則剝蝕不可盡辨石南有梧桐高尋丈良琴材也旁有古藤盤拏其上若張蓋然與堂相值堂東廊壁間嵌趙魏公書前後赤壁賦石刻筆情瀟灑深得賦心循廊而南折而西爲舫齋康茂園中丞攝郡時題曰虛舟虛舟之北有曲池池上竹數十竿與池水爭綠池北卽海石石後有坪廣數席皆種桃桐石之間有石橋跨池上蘚

花斑然桃陰有架接於堂檐木香藤被之其他山茶叢
桂芳溪雜卉皆環石而拱斯堂余病清羸大府強起權
守是邦無毫髮裨吏民每一動念未嘗不在烟霞泉石
間也觸景生情流爲吟賞聊成八詠以寫我懷時庚午
春仲也

絕似柳州小記

秦小峴

虎邱一榭園記

代

予領郡之二年旣濬城河修塘路思香山遺愛專建白
文公祠祠故塏影園也名勝鼎新遊舫磨集乃於祠之
東岸得隙地闢爲園額以一榭名其堂曰思白爲余休
沐遊憩之所暇則偕賓僚飲讌其中偶讀白公旬宴詩
嘉其閒適而不廢事雖才遠不逮心竊慕焉客曰宦游
而營園亭者必於其鄉邑以爲菟裘微論平泉午橋卽
白公醉吟亦在履道坊所謂洛中小宅渭上別墅初何
嘗自置一園於山塘野寺間乎予曰此有私之見者存
也自其大公者觀之榮利如寄遊宴獨非寄耶官舍如

郵林泉獨非郵耶晉公流連於繡魚贊皇低徊於醒石
今安在哉予典劇郡時際休和大吏敷仁羣寮奏績風
雨節寒暑時故得以從容効職割餘俸而興築乘閒宴
以盍簪敢自私乎城隅舟泛隄畔橋橫白祠之修與吳
民共之則斯園也亦與吳民共之而已旣以應客因次
白公詩韻而記之

私者無往非私公者何在不非公熟讀斯文當可爽然
已持謙記

瑞萼堂記

蔣錦橋比部自都郵致其邑令龔君慶驥瑞萼堂詩屬爲之記先是比部尊甫瑤川別駕手植山茶花一株久而榦竦出簷花繁照屋辛酉春有三萼連跗者適廳事落成龔大令因名其堂曰瑞萼而聲之以詩嗚呼大令可謂知風化之本矣人生至難得者兄弟至易隙者亦兄弟田廬衣食妻子奴僕皆隙也若屬有讒人交構其間私室勃谿公庭牒訴長民者不能戶至而人說之得一賢搢紳家式廬表宅庶幾不言之教乎昔召穆公思兄弟之恩疏因燕而爲歌詩以親之其首章曰常棣之

華鄂不韡韡箋云承華者鄂鄂足曰柎古聲不柎通韡
韡者以華之光明與弟敬事兄兄榮覆弟恩義之顯正
義云弟得兄榮兄亦得弟助兄弟相助猶華鄂相承覆
故曰莫如兄弟其卒章曰是究是圖亶其然乎所以勸
也今蔣氏族尙禮讓比部之昆泰垣敬亭皆以拔萃通
籍尤爲恩義之顯韡韡然宜乎協氣感通生祥下瑞賁
於草木也抑又聞之山茶花開耐久見陸放翁詩王梅
溪謂之歲寒種則其爲瑞儻亦有歲寒耐久之徵乎然
則比部之寄詩索記非夸也欲教子孫久而彌篤封植
此樹以毋忘先澤長爲鄉國望抑亦賢司牧意也故樂

爲之記

先生篤於友誼不覺情生於文

持謙記

又一邨讀書圖記

又一邨者歐陽岳庵白齋昆季讀書精舍也白齋尊甫爲棣之先生岳庵尊甫爲淦泉先生同懷合志以琴書爲弓冶故二子皆年少諸生蜚聲名公卿間甲第聯翩有日矣猶慮其得少自足逐物而移也關又一邨以居之使之昕夕交修擇賢師友與之往來切劘以成其器謝遠紛華涵養德性人咸謂式穀宜爾也余以爲又一邨之義有五善焉可以參理境之深可以悟文心之曲可以振精進之氣可以擴講習之識可以暢游藝之神蓋觀理者如登山由麓至椒自謂廣覽又上仙的而

望神囂廓乎有容然後知其深也行文者汭流窮源如
往而復及至武夷九曲湘水三十六灣則又自嫌徑直
耳失幽討之士攬秀臨漪亦少倦矣又見桃花流水別
有天地則神志爲之一振精進者亦然不可使怠氣乘
之若夫麗澤之兌開徑之益敦行強識迥異謏聞而又
有超超元箸廣已而造大焉斯擴之彌閎矣且夫不窺
彌綸之體者無旁行不流之用也不知逢源之妙者無
深造自得之功也優而游之使自求之藝也而進於道
矣又烏可無以暢之哉此五者皆當於避囂習靜中得
之余與兩先生爲道誼交故不嫌以學究夫子之說進

放勲曰又從而振德之盤銘曰又日新又之時義大矣
哉余願與兩賢共勉之因以弁諸圖端

拈一又字乃有如許妙諦

持謙記

古甃硯記

此硯得之故適適圍其質甃重百八十八兩方尺有一寸四分厚寸八分面爲井其文長不及方者寸廣寸二分深七分外有圻鄂廣寸近井文末者廣五寸中爲田方七寸能受墨背四周爲雲雷方篆各二錯或以爲漢宮魯靈光殿璧未能詳也同年王晚馨宰閩以治平第一

召擢州牧道過吳門適奉檄采生黃銅二萬觔生黃銅者紅銅七白鉛三和鍊而成非可猝辦從容過從因出此硯贈之晚馨甚喜自爲銘曰養不窮公無私不髻墜

鑿耕之屬余銘曰如井出泉清其源如田有畔愼厥思
如璧日運動乃事時孫淵如觀察汪齡雲主事在座皆
銘之孫曰漢宮甄文班如問井旧吏而儒汪曰仰觀天
文潑盪一斗爲雲漢章爲霹靂于是吳子竹虛繪爲
圖因并記之晚馨名紹蘭蕭山人淵如名星衍陽湖人
浣雲名梅鼎休寧人竹虛名履嘉興人

一璧四銘各臻其妙

秦小峴

琥珀鼻菸壺記

鼻菸者東洋人屑菸葉如塵漬以他汁而盞之實諸玻
瓈瓶爲一刺精者充

貢品餘亦每刺價兼金其臭以辛酸爲上納少許鼻中
可以解肺寒踈肝鬱善明目已頭風京師貴人相餉遺
會賓客則出袖中先茗汁交獻酬其菸皆分於刺爲小
甌可握弄曰菸壺壺必以金玉余昔得一松紋琥珀者
大如杭子質堅而輕中空能容頗愛之不釋手雖瑪瑙
車渠羊脂翡翠諸玉不以易也嘉慶元年爲一將官攫
去惋惘無已大凡友朋會聚各出鼻菸以通款洽必先

譽其壺余頗憶前所失舉以告人今二十五年矣過揚州謁甘泉羅大令方把晤間大令遽曰頃有人以琥珀菸壺求售吾嘗熟聞君言其形製絕相似因棄篋以待乃取而見贈果吾故物也豈意力數豪歛閱歲二紀之久而仍入吾手乎拜而受之喜可知矣大令亦有心人哉夫一小甌耳非必玩好之具也非必希世之珍也乃余嘗以金寶與人或被強求巧取過而輒忘獨是物久而不忘於懷不能已於言而彼亦展轉推遷卒爲有心人所得復歸於我毋亦有若或使之然耶且未失之先視之尙爲常物及失而復得雖合浦還珠連城返璧不

是過也器猶求舊而況人乎

鼻煙壺不見前人記載得此文可與麈尾唾壺同爲
典故近世茗椀有船食案有單以及瓜插蠅旗皆製
造之便於日用者惜無文筆旌之物亦有幸不幸也
秦小峴